

佛說盂蘭盆經

西晉月氏三藏法師竺法護譯

聞如是：一時佛在舍衛國，祇樹給孤獨園。大目乾連始得六通，欲度父母，報乳哺之恩。即以道眼觀視世間，見其亡母生餓鬼中，不見飲食，皮骨連立。目連悲哀，即鉢盛飯，往餉其母。母得鉢飯，便以左手障鉢，右手搏食。食未入口，化成火炭，遂不得食。目連大叫，悲號涕泣，馳還白佛，具陳如此。佛言：「汝母罪根深結，非汝一人力所奈何。汝雖孝順，聲動天地，天神、地神、邪魔、外道、道士、四天王神，亦不能奈何。當須十方眾僧威神之力，乃得解脫。吾今當說救濟之法，令一切難，皆離憂苦。」佛告目連：「十方眾僧於七月十五日僧自恣時，當為七世父母及現在父母厄難中者，具飯百味五果、汲灌盆器、香油錠燭、床敷臥具、盡世甘美，以著盆中，供養十方大德眾僧。當此之日，一切聖眾，或在山間禪定、或得四道果、或在樹下經行；或六通自在，教化聲聞緣覺；或十地菩薩大人，權現比丘，在大眾中；皆同一心，受鉢和羅飯。具清淨戒聖眾之道，其德汪洋，其有供養此等自恣僧者，現世父母、六親眷屬，得出三途之苦，應時解脫，衣食自然。若父母現在者，福樂百年；若已亡七世父母，生天自在，化生入天華光。」時佛勅十方眾僧，皆先為施主家呪願，願七世父母……行禪定意，然後受食。初受食時，先安在佛前、塔寺中佛前，眾僧呪願竟，便自受食。時目連比丘及大菩薩眾，皆大歡喜，目連悲啼泣聲，釋然除滅。時目連母，即於是日，得脫一劫餓鬼之苦。

爾時目連復白佛言：「弟子所生母，得蒙三寶功德之力，眾僧威神之力故。若未來世一切佛弟子，亦應奉盂蘭盆，救度現在父母，乃至七世父母，可為爾不？」佛言：「大善快問！我正欲說，汝今復問。善男子，若有比丘比丘尼、國王太子、大臣宰相、三公百官、萬民庶人，行慈孝者，皆應先為所生現在父母、過去七世父母，於七月十五日：佛歡喜日、僧自恣日，以百味飲食安盂蘭盆中，施十方自恣僧。願使現在父母，壽命百年、無病、無一切苦惱之患，乃至七世父母，離餓鬼苦，生人天中，福樂無極。」佛告諸善男子、善女人：「是佛弟子修孝順者，應念念中常憶父母，乃至七世父母。年年七月十五日，當以孝慈，憶所生父母，為作盂蘭盆，施佛及僧，以報父母長養慈愛之恩。若一切佛弟子，應當奉持是法。」時目連比丘、四輩弟子，聞佛所說，歡喜奉行。

南無密栗多 哆婆曳莎訶（誦報恩咒四十九遍）